



# ANG Paghimakas

Pabayagan sang Partido Komunista sang Pilipinas ★ Isla sang Negros  
Ginaubayan sang Marxismo-Leninismo-Maoismo SETYEMBRE 2024

## Paghatag sang mataas nga pagsaludo kay kaupod Ernesto Jude Rimando

*Sundon ang iya pagkahuwaran sa paghalad sang iya bug-os nga kabuhi, kaalam kag talento agud maukod, militante kag wala pagkataka nga mapasulong tubtob sa kamatayon ang kadalag-an sang rebolusyonaryong armadong paghimakas sa Negros!*

*Komiteng Rehiyunal sang Partido sa Isla sang Negros  
Setyembre 30, 2024*

*"Paghatag..." sundan sa pahina 2*

**AP** Kaundan

Paghatag sang mataas nga pagsaludo kay Kaupod Ernesto Jude Rimando, 1  
Paalam Kaupod Jude Rimando, 6  
'Daku ka nga bahin sang amon kabuhi', 9  
Rebolusyonaryo nga pagsaludo kay Ka Jude Rimando!, 10  
Mga parangal para kay Ka Ernesto Jude Rimando, ginhiwat, 12  
Bug-os nga kabuhi para sa rebolusyon, 12





*“Malipayon ako sa akon kabuhi nga gin-usoy kag sa manggaranon nga eksperyensiya nga akon natun-an sa paghimakas. Ining eksperyensiya nagtulod sa akon nga bayaan ang akon mga personal nga ambisyon kag ihatag ang akon bug-os nga kaugalingon sa pag-alagad sa mga mamumugon kag mga mangunguma.” - Ka Dante*

*"Paghatag..." halin sa pahina 1*

ANG KOMITENG REHIYUNAL SANG PARTIDO sa Isla sang Negros (KRPIN) upod ang bug-os nga katapuan sang Partido, mga Pulang kumander kag hangaway sang Bagong Hukbong Bayan kag mga rebolusyonaryong pwersa sa isla sang Negros nagahatag sang mataas nga pagsaludo sa kay Kaupod Ernesto Jude “Ka Dante” Rimando, 58 anyos. Wala pagkangilin nga ginhalad niya ang sobra apat ka dekada sang iya kabuhi sa pag-alagad sa masang ginapigos kag ginahimuslan indi lang sa isla sang Negros kundi dako nga bahin sini sa Metro Manila kag Central Visayas tubtob sa iya kamatayon sa sulod sang rehas sang mapiguson nga sistema sang reaksyunaryong nagahari nga sahi sang nagligad nga Hulyo 23, 2024.

Enero 2021, sa kasingki sang isyu sang Covid-19 nga pandemya nga gingamit ni anay Presidente Duterte sa pag-imposar sang iya pasista nga paghari, gindakup si Ka Dante sang mga pwersa sang estado base sa himo-himo nga mga kaso kag pagtanum sang ebidensiya sang siya nagpabulong sang iya masakit nga *liver cirrhosis* sa Metro Ma-

nila. Iligal siya nga ginpriso kag tungod sa restriksyon sa sulod sang prisohan, ilabi na gid sa hinanali nga akses sa kinahanglanon medikal, naglubha ang iya masakit sa *stage 4 liver cancer* kag nagkumplikar sa tuberculosis. Bisan pa nga ilisipon na lang ang inadlaw sang kabuhi kag tumana na ka luya sang lawas, wala ginpahanugutan sang wala sang balatyagon nga rehimen US-Marcos Jr ang ginpangayo ni Ka Dante nga hilwayon siya sa makitawhanon nga basehan para makaupod ang iya pamilya sa ulihi nga tinion sang iya kabuhi.

Si Ka Dante naghalin sa sahing petiburgesya sa urban. Una nga napukaw ang kamuklatan sa pungsodnon demokratikong rebolusyon sang pamatan-on estudyante pa lamang sa Philippine Science High School. Nangin maayo nga batan-on nga kadre nga komunista, nangin pinakahuben nga rekrut sang Partido nga nagpamuno sang rebolusyonaryong kahublagan kabataan kag estudyante nga nagpukaw, nag-organisa, kag nagpahulag sang libuan ka mga hayskul nga mga estudyante kaupod ang ila mga manunudlo sa

*"Paghatag..." sundan sa pahina 3*



SETYEMBRE 2024  
ISPESYAL NGA ISYU

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.

ANG **Paghimakas**



angpaghimakas@protonmail.com



negrosrevportal.wordpress.com

"Sa tunga sang mga sakripisyo kag mga panghangkat, padayon nga ginsunod ni Ka Dante ang mga kinaiya sang isa ka maayo nga kadre. Nagpabilin siya nga mabakod sa pagpangapin sa mga imol, kag nagpraktika sang unibersal nga teorya sang Marxismo-Leninismo-Maoismo (MLM). Bisan ginbasura sang korte ang kaso batok sa iya, indi makatarungan nga ginpabilin siya sa sulod sang prisohan tubtob sa adlaw sang iya kamatayon. Ang ini nga hitabo hungod nga pagdingot sang hustisya kag maathag nga halimbawa sang terorismo sang estado.

Ginpanggas siya nga binhi sang rebolusyonaryo nga kaalam kag kaisog nga magapatubo pa sang mas madamo nga rebolusyonaryo sa palaabuton nga mga tinuig."

**Halin sa "Ernesto Jude 'Ka Jude' Rimando: Ginpanggas nga binhi sang rebolusyonaryo nga kaalam kag kaisog" sang Leonardo Panaligan Command-New People's Army Central Negros Front**

"Paghatag..." halin sa pahina 2

Metro Manila batuk sa pasista nga diktaduryang US-Marcos.

Bisan tuman pa ka lamharon, mataas na ang pagsapol ni Ka Dante sa kakinahanglanon sa paghalad sang kaugalingon para sa kahilwayan kag demokrasya. Ginpamatud-an niya ini sang nagdesisyon siya nga maghulag nga lubos panahon nga kadre-organisador agud mamuno sa kahublagan kabataan kag estudyante sa bug-os nga Metro Manila. Nangin maayo siya nga organisador-kadre sang Partido tubtob sa iya pagtapak sa kolehiyo. Nagbulig siya sa pagpukaw kag pagpahulag sa mga estudyante, manunudlo, empleyado kag komunidad sang UP-Diliman samtang naga-eskwela sa pagka-enhenyero. Upod siya sa nagpabulwak sang kahublagan protesta kag kahublagan boykot-barikada sang rebolusyonaryong kahublagan kabataan kag estudyante sa mga unibersidad, eskwelahan kag komunidad sa University Belt kag Metro Manila nga nagpamartsa kag nagparali sa puluan ka libo nga pamatan-on kag pumuluyo sa kadalanan batuk sa pasista nga diktaduryang US-Marcos.

Tungod sa pagpakigbahin ni Ka Dante sa mabaskog kag lapnagon nga kontra-diktadurya nga kahublagan, pagpakighalubilo sa mga sandigan nga masang mamumugon kag mangunguma, pagpakigbahin sa mga pagtuon sa pungsodnon kag rebolusyon Pilipino, kag pagbasa kag pagtuon sang madamo nga teoryang Marxista-Leninista-Maoista (MLM), napamanggad niya ang iya kaugalingon sa ideolohiya. Nasa-pol niya ang kahustohon sang linyang demokratikong rebolusyon sang banwa kag ang pagkamalahalon sang siyentipiko nga kamatuoran sang MLM bilang ubay para malab-ot ang pungsod-

non nga kahilwayan kag demokrasya. Sa iya pagkakita sang kakinahanglanon nga lubos nga alagaran ang interes sang malapad nga pumuluyo, nagdesisyon siya nga mag-untat sa pag-eskwela kag magpultaym para mag-ugyon sa rebolusyonaryong praktika sang pumuluyo, ilabi na gid sa masang mamumugon kag mangunguma.

Maukod kag pursigido ni Ka Dante nga ginpatuman ang nagkalain-lain nga hilikuton nga gin-atas sa iya. Militante kag makahas man niya nga ginbaton ang mga panghangkat nga magamot sa pagpasulong sang rebolusyonaryo nga kahublagan sa kaislahan sang Bisayas bisan pa sa problema sa lenggwahe kag kultura. Sobra duha ka dekada siya nga naghulag sa Bisayas. Halin 1998 tubtob 2016, naghulag si Ka Dante sa rehiyon sang Sentral Bisayas. Nangin katapo siya sang Kalihiman sang Rehiyonal nga Komite sang Partido sa Sentral Bisayas. Nagtungod siya sa hilikuton Urban Cebu, ilabi na gid sa mga mamumugon. Pinakamatingkad diri ang iya kontribusyon sa istrayk sang mga mamumugon sang Sulpicio Shipping sadtong 2002.

Ang pagkapursigido ni Ka Dante bilang proletaryado nagdangat sa iya pagpatuman sang kumprehensibo nga hilikuton sang armadong paghimakas sa kabukiran sang Kabisay-an, sa Cebu, Bohol, Leyte, kag subong man sa rehiyon sang Negros.

Sang tuig 2017-2019, na-deploy si Ka Dante sa isla sang Negros kag nangin katapo sang Komiteng Tigpatuman (KT) sang KRPIN. Isa sya sa nagpamuno sa kahublagan pesante kag naghikot sa mga mamumugon sa katubuhan, ilabi na ang pagduso sang serye sang mga bungkalan sa mga *land cultivation areas*

*"Halin sa diktadurya sang amay pakadto sa anak nga si Marcos Jr, nakigbato si Ernesto Jude "Ka Dante" Rimando Jr para sa kinamatarung kag demokrasya sang mga mamumugon kag mangunguma.*

*Bisan sa iya ulihi nga mga inadlaw, militante kag malipayon si Ka Dante nga naghalad sang iya kabuhi kag kinaalam para sa pumuluyo. Ang iya pagkamartir, ginakasubo sang linibo ka mga pumuluyo nga nabuligan ni Ka Dante. Ang iya militansya kag optimismo mangin inspirasyon sa linibo pa ka pumuluyo nga magasugpon sa rebolusyonaryo nga kahublagan nga iya ginsuguran."*

***Halin sa "Mapula nga pagsaludo kay Ernesto Jude Rimando! Bilanggo nga pulitikal, beterano nga aktibista kag organisador!" sang Armando Sumayang Jr Command-New People's Army Southwest Negros Guerrilla Front***

*"Paghatag..." halin sa pahina 3*

ukon LCA. Tungod sa iya kaalam kag kahanason sa elektronikong teknolohiya, nagamit niya ini sa pagbulig sa paghimo sang mga pagpanalawsaw para sa pagbuo sang mga sosyal nga imbestigasyon (SI), nga materyal nga ubay sa paglunsar sang mga kampanyang kontra-pyudal sa kahublagan pesante diri sa Negros.

Bisan nahulog na sa kamot sang kaaway kag gintanggong sa prisohan, wala nadulaan si Ka Dante sang paglaum kag padayon ang espirito nga makig-away. Sa pila ka *fasting* nga ginlunsar sang mga poldets (*political detainees*) sa Negros halin sa tunga-tunga sang 2022, kon diin nagpakigbahin man ang mga poldets sa Camp Bagong Diwa sa Bicutan, dako ang nangin papel ni Ka Dante diri. Bisan sa iya malubha nga masakit, isa siya sa tigpalapnag sang *fasting* bilang epektibo nga pamaagi para mapanday ang malig-on nga paghiliusa sang mga poldets kag para mabandera kag mahatagan sang pagtamod ang mga isyu kag demanda nila. Indi siya gusto nga tungod nasulod na sila sa hawla sang prisohan magabaton na lang sila sang ayuda. Indi niya mabaton nga tungod nabilanggo na sila indi na sila magtungod, sa kutob sa ila masarangan, sang ila mga rebolusyonaryo nga katungdanan.

Bilang mga materyalista wala sang perpekto nga proletaryado, kinahanglan nga kiharon sa duha ang kaupod, nga dako nga bahin ang iya kabaskugan kag gamay nga bahin ang iya kahuyangan. Kasubong ni Kaupod Dante indi siya perpekto, may mga mabaskog siya nga kahuyangan nga ginatinguhaan man niya nga mabag-o, ilabi na naghalin siya sa sahing petiburges. Apang ang maayo nga

kinaiya sang kaupod amo nga bukas kag ginabaton niya ang mga pagsaway sa iya kag kritikal man siya sa iya kaugalingon agud padayon nga magbag-o para sa kaayuhan sang pumuluyo kag rebolusyon.

Ang bug-os nga kabuhi ni Ka Dante sa rebolusyon tuman ka maduagon kag puno sang mga panghangkat tubtob sa paghalad niya sang iya kabuhi. Apang ang nagsilsil sa panghuna-huna sang iya mga nakaupod sa rebolusyon amo ang iya malipayon, kapagsik kag pagkatutom nga tungdan ang iya mga hilikuton kag pagkatampad nga komunista tubtob sa iya kamatayon.

Ang pagpasulong sang rebolusyon indi tayuyon, maga-agi ini sa pagliko-liko, pasaka kag paidalum, pagbaskog kag paghuyang. Sa subong, masingki ang atake sang pasistang rehimen US-Marcos Jr sa bug-os nga rebolusyonaryong kahublagan indi lang sa Negros kundi sa bug-os nga pungsod. Nakatuga man ini sang dako nga halit sa pangkabug-osan, ginatinguhaan sang tanan nga katapo sang Partido sa tanan nga lebel nga mapangibabawan ang internal nga kahuyangan sa ideolohiya, pulitika kag organisasyon paagi sa paglunsar sang ikatatlo nga kahublagan panadlong agud padayon nga mapasulong ang rebolusyon tubtob sa kadalag-an. Himuon nga huwaran ang kabuhi ni Ka Dante agud magmangin-maayo kag malig-on nga rebolusyonaryo para makaamot sa dugang nga pagpaabante sang rebolusyonaryong kahublagan sa bug-os nga pungsod. Ang iya paghalad sang iya bug-os nga kabuhi, ang iya kinaiya sang pagkapursigido, maukod, kag indi pagkamaiya-iyahon mangin ins-



"Paghatag..." halin sa pahina 4

pirasyon sa mga rebolusyo-  
naryo sa isla sang Negros nga  
sa gihapon padayon nga atu-  
bangon ang mga panghangkat  
sa pagpasulong sang arma-  
dong paghimakas bisan pa sa  
grabe nga sakripisyo kag ka-  
budlayan kabuhi man ang  
ihalad.

**Mabuhay ang mga  
dungganon nga martir  
sang rebolusyon sa isla  
sang Negros!**

**Isulong ang demokratikong  
rebolusyon sang banwa  
tubtob sa kadalag-an! *RP***



"Ang mapatay nga naga-alagad sa malapad nga masa mas  
mabug-at pa sang sa bukid Kanla-on. Apang ang mapatay nga  
naga- serbisyo para sa interes sang mga nagahari nga sahi nga  
agalon may duta, dalagku kumprador burgesya kag burukrata  
kapitalista mas mamag-an pa sang sa balahibo sang manok.

Bug-os tagipusu-on nga ginbaton ang responsibilidad nga  
ginhatag sa iya. Maukod sa pagtuon sang mga MLM nga  
balasahon kag halos sistimatisado ang filing sa rekord  
sang mga dokumento. Matutom sa pag-research para  
magamit sa lain-lain nga linya sang hilikuton ilabe  
na sa pagpasulong sang mga kontra-pyudal nga  
awayan sa duta. Isa ini ka dalayawon nga kinaiya  
kag para sa iya ang sakripisyo kag kabudlayan upod  
sa malapad nga masang pesante isa na ka normal  
nga hitabo sa kabuhi bilang isa ka rebolusyonaryo."

**Halin sa "Pulang pagpasidungog kay Ka  
Dante" sang Pambansang Katipunan ng mga  
Magbubukid-Negros**

"Kilala si Kaupod Jude sa YS kag sa iban pa nga sektor sa koda nga Bogs ukon Bogz. Ginpanubo ini  
sa Bogtsi ukon Bogchi nga baliskad sang Tsibog o Chibog bangud sa mapagros kag manamit niya  
nga pagkaon kag matuod nga manami siya nga makaupod kag kadungan sa pagkaon.

Matuod nga tuman ka alam ni Bogz sa punto nga antes pa naglapnag ang Microsoft Windows,  
naghimo na siya sang tipo nga drowing sa iya kwaderno sang programa nga kapareho sa Windows  
ukon website nga gamiton sa pag-profile sa hilikuton sa pag-organisa kag malipayon niya ini nga  
ginapresentar sa mga kaupod.

Antes pa napanghuna-hunaan nga ideploy si Bogz sa Central Visayas, ginatun-an na niya ang  
lenggwaha nga Bisaya. Manami gid siya nga kaestorya kag kahinun-anon tungod matuod nga  
madamo gid siya sang nahibaloan.

Manami man siya nga kaupod sa malawig kag mabudlay nga paglakat kag pagsaka sa kaumhan  
kag sonang gerilya sang Laguna-Sierra Madre, Mindoro kag Bicol kon diin ginahiwat ang serye  
sang mga pagtuon kag pagsinapol.

Tuman ka ayo kag mabuot siya nga tawo, abyan kag kaupod."

**Halin sa kababata ni Ka Dante sang organisador pa siya  
sang mga pamatan-on kag estudyante sa Metro Manila**

# Paalam, Kaupod Jude Rimando

*Mensahe halin sa mga bilanggong politikal sa NBP-Maximum*

HULYO 23, 2024 NAGPAALAM NA KAG MAHAMUOT nga nagpahuway sang lubos si Kaupod Jude Rimando sa edad nga 58.

Si Kaupod Jude isa ka rebolusyonaryo kag nangin martir sang banwa. Masobra ukon manubo sa 40 ka tuig, bug-os panahon nga ginhalad niya ang kaugalingon nga kabuhi sa pagserbisyo sa mga rebolusyonaryo nga handom sang pumuluyong Pilipino batok sa mahimuslanon kag mapigoson nga nagahari nga sahi kag sang imperyalismong US.

Enero 2021 gindakop si Kaupod Jude sang mga pwersa pangseguridad sang estado sandig sa ila hinimo-himo nga kaso kag gintanom nga mga ebidensya sang siya nagpabulong sang iya nga mga masakit. Iligal siya nga gindakop kag bangud sang mga restriksyon sang mga kinamatarung sa prisohan, madasig nga naglala ang iya mga masakit. Ulihi na ang paghimo sang maidid nga medikal nga pagpadalum sa iya ginabatyag kag nahibaloan nga may *stage 4 cancer* siya sa atay. Kag bisan siya nagahigda na lamang kag gina-isip na ang nabilin nga mga inadlaw, gindingotan pa gihapon siya sang mapintas nga reaksiyonyo nga estado sang iya ginapangayo nga kasug-tanan nga pagkilala (*recognizance*) halin sa korte para sa iya gamay nga espasyo nga kahilwayan.


Daku nga kawad-on si Kaupod Jude sa kubay sang rebolusyonaryo nga kahublagan. Indi siya malipatan sang mga sahing mamumugon kag mangunguma nga malawig nga gin-updan kag gin-alagaran niya. Luyag tani niya nga sa iya paghilway, gilayon siya nga magbalik sa mayor nga agos sang rebolusyonaryo nga kahublagan. Apang sa kalit nga pagliso sang panghitabo nautod ang iya mga damgo. Nagbilin na lang siya

sang mga handurawan bahin sa iya kabuhi kag mga kontribusyon sa rebolusyonaryo nga kahublagan. Labi sa tanan, ginbilin niya ang mga malahalon nga pagtulun-an nga mahimo nga makuhaan kag magserbe nga ubay sa aton tayuyon nga rebolusyonaryo nga praktika.

Si Ka Jude naghalin sa sahi nga petiburges sa syudad, nakatapos sang edukasyon sa Philippine Science High School kag nagpadayon sa pagtuon sang kurso nga *engineering*. Bangud sang iya eksposyur kag pagpakigbahin sa mabaskog kag lapnagon nga kontra-diktadurya nga kahublagan, pakig-angot sa mga sandigan nga masang mamumugon kag pagpartisipar sa mga pagtuon pampulitika kabahin sa sosyedad kag rebolusyon Pilipino kag pagtuon man sang teorya sang Marxismo, gilayon siya nga nakamuklat bahin sa kahustohon sang linya nga demokratiko nga rebolusyon sang banwa kag sa kamalahalon sang siyentipiko nga kamatuoran sang Marxismo bilang ubay para malab-ot ang pungsodnon nga kahilwayan kag demokrasya. Bangud sa pagsagop niya sa interes sang mga pumuluyo, wala niya gintapos ang pag-eskwela sang iya kurso sa kolehiyo. Nagdesisyon siya nga magbalhin bilang pultaymer para sa pagtuon kag pakigbahin sa rebolusyonaryong praktika sang pumuluyo.

Bangud sa iya paghatag sang importansya sa teorya nga Marxismo para mangin kasanag sa iya mga rebolusyonaryo nga hilikuton, nagpabilin nga mabakod ang iya pagtukod sang pundasyon pangideolohiya nga proletaryo sa tunga sang grabe nga mga panghangkat kag pagtilaw sa sulod kag

*"Paalam..." sundan sa pahina 7*



*Kahibalo si Kaupod Jude nga makaangkon siya sang kahigayonan agud makatuon kag maka-amot sa nagapanguna nga porma sang paghimakas. Halin sa hayag kag legal nga kahublagan urban, nagsangkad ang iya nga ibibalo sa Marxismo paagi sa direkta nga pagpakigbahin sa inaway banwa sa kaumhan.*

"Paalam..." halin sa pahina 6

guwa sang rebolusyonaryong organisasyon nga proletaryo. Ginagamit niya ini nga mga ibibalo sa teorya agud pauswagon ang iya nga disposasyon sa Marxista nga panindugan, panglantawan kag pamaagi sa pag-atubang sang mga hilikuton kag problema. Bangud iya nahangpan ang iya sahi nga ginhalinan, mga kahuyangan, kakulangan kag limitasyon, nagpabilin siya nga militante kag kalmado sa pagpakigbanggi sa malain nga impluwensya sa kaugalingon kag organisasyon. Wala siya naguntat sa pagpakig-away kag pagsikway sang tendensiya nga makaisa ka bahin nga suhetibismong petiburges kag nakaaangkon siya sang disposasyon sa pagbangon kag pagbag-o.

Iya nakumpleto ang pagtuon sa tatlo ka lebel nga kurso sang proletaryong partido bilang tumuluon kag manunudlo. Bangud sa iya teoritikal nga kapasidad, nakahimo siya sang kaugalingon nga pagtuon sang mga sinulat sang mga bantog nga mga manunudlo, mga sinulat kag interbyu ni Prof. Jose Ma. Sison, kag iban pa. Aktibo siya nga nagatambong kag nagapartisipar sa mga hilikuton pagsumada, mga kumprehensibo nga pagsumada kag ispesipiko nga sakop sa rehiyunal nga lebel kag sa mas manubo nga lebel. Nakatuon

man siya sang mga pagsumada sang pungsodnon nga sentro sang proletaryong partido kag iban pa nga mga pag-analisa kag pagpaathag sini.

Tayuyon ang iya pag-uyat sang hinganiban nga pagsaway kag pagsaway sa kaugalingon bilang sangkap sang edukasyon para sa pagremolde sa kaugalingon. Kahibalo siya sang kamalahalon sini sa sandigan nga Marxista nga prinsipyo. Bukas siya kag kritikal sa kaugalingon sa panahon sang banggianay sang mga ideya kag pagsaway kag pagsaway sa kaugalingon. May pila ka panghitabo sang pagtasa kag pagsumada kon diin nakasayang ang nangin papel ni Kaupod Jude sa pagluntad sang mga kasaypanan kag kakulangan sa mga hilikuton kon diin nasentruhan siya sang mga laygay kag pagsaway. Wala siya nagpangluya. Ang ini nga hinganiban dako nga bulig sa iya pagremolde sa kaugalingon, ginpasulong ang iya nga ikasarang sa Marxismo kag pag-away sa makahalalit nga suhetibismo, oportunismo kag rebisyunismo.

Nagpursige si Kaupod Jude sa pagpatuman sang linya, patakaran kag responsibilidad sang demokratikong rebolusyon sang banwa. Agud makaamot sa pagtukod sang kusog sang pumuluyo nga nagapanguna nga nagsalig sa alyansa sang sahing mamumugon kag mangunguma

iya ginpakita ang kahandaan kag katutom sa pag-ugat kag pag-organisa sa mga mamumugon sa mga sentrong syudad sa National Capital Region kag probinsya sang Cebu. Magluwas sini, nagtungod man siya sang katungdanan sa pag-organisa sang mga mangunguma sa mga puting purok sa nasambit nga mga probinsya.

Wala pagpangduha-duha nga nagsabat siya sa panginahanglanon sang rebolusyonaryong proletaryo nga kadre para sa armado nga paghimakas sa kaumhan. Kahibalo si Kaupod Jude nga makaangkon siya sang kahigayonan agud makatuon kag maka-amot sa nagapanguna nga porma sang paghimakas. Halin sa hayag kag legal nga kahublagan urban, nagsangkad ang iya nga ibibalo sa Marxismo paagi sa direkta nga pagpakigbahin sa inaway banwa sa kaumhan.

Sadtong una nga katunga sang dekada 2000, nasumalang ni Kaupod Jude ang daku nga panghangkat sa iya ikasarang sa atubang sang grabe kag dalagku nga kampanya militar sang AFP/PNP agud dugmokon ang NPA sa mga magagmay nga isla sang Bohol.

Isa siya sang nagpanguna nga mga kadre nga nagpas-an sang responsibilidad sa pagp-



"Paalam..." halin sa pahina 7

reserba sang hukbo paagi sa gerilya nga mga taktika sang paghulag. Malapad ang nalab-ot nga espasyo sang maniobra, nakalab-ot ang NPA sa pagbalhin sa Southern Leyte. Madinalag-on nga napwersa ang pwersang gerilya indi lang sa pagpreserba sa kaugalingon kundi sa pagtukod sang baseng masa, paglunsar sang pila ka taktikal nga opensiba batok sa kaaway kag pag-asikaso sang mga problema sang masa sa duta.

Nadugangan ang mga kontribusyon ni Kaupod Jude sang ginbalhin ang bilog nga pwersa sang NPA sa bahin sang Southeast Negros para palaparon ang mga larangan gerilya kag pabaskugon ang armado nga paghimakas sa ikaapat nga mayor nga isla sang pungsod. Isa pa gihapon siya sa nagpamuno nga kadre agud mapatuman ang mga responsibilidad sini. Madinalag-on nga natukod ang larangan gerilya kag napauswag ini sa sakop sang masobra isa ka distrito, pagdaku sang isip sang NPA, baseng masa, paglunsar sang masarangan nga taktikal nga opensiba kag mga paghimakas kontra-pyudal. Sang 2008 nakabulig ang larangan sa pagbaton kag paghatag sang mga serbisyo para sa hiwaton nga kumperensya sang mga kadre halin sa iban nga rehiyon. Apang sa mga tunga-tunga sang dekada 2000, may pagbag-o sa iya *deployment*, gintalana siya sa mga rebolusyonaryo nga buluhaton bilang kabahin sa nagapamuno nga kadre para sa legal kag hayag nga demokratiko nga kahublagan urban kag nagahiliugyon nga prente.

Sa diin man italana si Kaupod Jude sa pagtungod agud mamuno, masaligan ang maayo nga resulta. Ang yabe sini ang iya pagpakamahal sang papel sang teorya nga Marxismo sa praktika sang rebolusyon Pilipino.

Ginpakita ni Kaupod Jude ang iya pagtib-ong sang prinsipyo sang demokratikong sentralismo bilang ubay sa operasyon sang sistema sang organisasyon sang proletaryong partido. Matingkad ini nga napamatud-an sa panahon nga gin-atake sang kontra-rebolusyonaryo nga mga traidor ang proletaryo nga partido kag mga sandigan nga prinsiyos sini. Isa siya sa dako nga mayoriya nga nagtib-ong kag nagsunod sang mga sandigan nga prinsipyo kag konstitusyon sang proletaryo nga partido. Aktibo siya sa pag-away kag pagsikway sang rebisyonismo, oportunismo, isplitismo nga kampanya sang mga nagpasimuno sini sadtong

una nga bahin sang dekada 1990s.


Importante man nga mapunting naton ang iya nga kaandamon sa pagpahigad sang iya personal nga interes agud panguna nga mahatagan sang importansya ang interes sang bug-os nga rebolusyonaryo nga proletaryo nga partido. Halin sang iya pag-untat sa pag-eskwela sa kolehiyo naghulag siya bilang pultaym agud mag-angot kag makigbahin sa mga isyu kag paghimakas sang pumuluyo para sa kahilwayan kag demokrasya. Bangud sa iya pagka-aktibo sa pagpamatok sang tendensiya nga sektaryanismo, wala man siya pangduha-duha sa pagbaton sang ginbalhin siya sa bag-o nga *deployment* sa probinsya sang Cebu. Kag labi sa tanan, hilway sa balatyagon nga iya ginbaton ang responsibilidad sa patag sang armado nga paghimakas sa tunga sang mga kabudlayan kag atake militar sang kaaway.

Magluwas sa nasambit sa ibabaw, nakaangkon man siya sang maayo nga angtanay kag pakigbuligay sa iban nga mga organisasyon sa iban nga lugar. Nahakus niya ang Marxista nga kamalahalon sang hambalanon sang ipauna ang interes sang mayoriya, kabilogan, organisasyon, mas mataas nga organisasyon kag sang pungsod-non nga sentro sang proletaryo nga partido sang sa kaugalingon.

Kasubong sa iban nga mga rebolusyonaryong proletaryo nga kadre wala man siya makalikaw sa paglapas sang prinsipyo sang demokratiko nga sentralismo. Indi siya depensibo agud mahatagan rason ang mga kasaypanan kag mga pagkulang. Malipayon niya nga ginadawat ang mga pagsaway sang mga kaupod sa iya kag kritikal man nga ginasaway ang iya kaugalingon. Sa kada pagkasayop, nakaganar siya sang mga leksyon nga makapauswag sang iya mga Marxista nga panindugan, panglantawan kag pamaagi.

Sang si Kaupod Jude nabudlayan na gid kag kahibalo siya nga indi na siya magdugay, nakayuhom pa siya nga ginhambal ang iya mapang-away nga esprito nga mga tinaga nga: "*Fight, Fight, We Will Win!*"

**Mabuhi si Kaupod Jude!** **AP**





# 'Daku ka nga bahin sang amon kabuhi'

*Mensahe-sulat halin sa asawa ni Ka Dante*

Dearest Tatayjj,

'Pangga, gusto ko ang naandan nga pamaagi sa pagsulatay naton nga duha ang ipadala ko sa imo, ugaling ang lain lang subong wala na ako sang sabat nga mabaton halin sa imo. Tapos, iban naman ang mabasa para makalab-ot ini sa imo. Masarangan namon ini 'Ga. Nabaton na namon sang mga bata nga imposible ka na namon nga pisikal nga makaupod. Pero ang masiling namon nga daku ka nga bahin sang amon kabuhi kag indi ini mapanas sa amon pamensaron.

Madamo nga salamat sa halos duha ka dekada sang aton pag-updanay bilang mag-asawa. Daku ang akon pagpasalamat sa masa nga ginapigos kag sa kahublagan nga amo ang nagtagbo sa aton kag nagpabakod sang aton nga panindugan kag paghigugmaanay. Madamo nga salamat sa wala kataka nga paghangop kag pagpasensya sa akon. Kahibalo ang tanan nga nakakilala sa imo nga bisan kaisa wala mo gindingot sa masa ang imo nga panahon, amo nga madamo nga beses nga wala naton gindayon ang aton *family integ* sa aton mga anak, bangud siling mo nga: pulitika anay antes na ang personal. Bisan pa sini, wala ko nakita ukon nabatian nga nagreklamo ka, bisan nga kahibalo ako nga ang imo pagkapungaw sa mga kabataan naton ginapaagi mo na lang sa patago nga pagpatulo sang luha. Madamo nga salamat nga bisan wala kita ka-updanay sa obra, nagabuligay pa gihapon kita sa pag-atubang kag paghatag solusyon sa mga problema, personal man ukon pulitikal. Taas-kamao ang akon pagsaludo sa imo pagka-*selfless* (indi maiya-iyahon) kag nakita man nakon ang imo seryoso nga pagpaninguha nga magremolde, para sa sahi kag sa kahublagan. Nadumduman ko pa ang imo ginsiling sadtong 2004, sang magkarelasyon pa lang kita, nga kon mag-abot ang panahon nga magtigulang ka na kag mangin masakiton, indi mo luyag nga mahigot ako sa pag-atipan sa imo. Gusto mo nga kon ano man ang matabo, magpadayon ako sa akon mga rebolusyonaryo nga mga hilikuton. Kag matawag naton nga amo gid ang natabo, Tay, halin sa katapusan naton nga pagkita, sang nagbiya ka agud magpabulong, sadtong Disyembre 2019.



Tuman ka damo na sang aton nasumalang sa pagrebolusyon, nga indi gid mabayluhan sang bisan ano pa man. Matuod, nadakop ka kag nartortyur, apang indi ini nangin kabangdanan agud talikdan mo ang imo ginpanumpaan nga alagaran ang pumuluyo. Subong man, madamo ka naman sang nahimo bisan pa halin na-*diagnose* ka sa *liver cirrhosis* sadtong 2019. Tubtob sa katapusan, mataas ang imo paghatag importansya sa masa kag mga kaupod.

Huo kag indi pa mahangpan sang aton duha ka kabataan ang imo nangin kabuhi. Apang sigurado ako nga palangga ka gid nila bilang ila nga Tatay. Kahibalo sila nga madamo ang nagapalangga sa imo kag nagadumdom sa imo. Matuod nga masubo ini nga panghitabo para sa aton mga pamilya, ilabi na sa aton mga kabataan. Pero ini man ang magabukas sang pwertahan agud dugang pa nila nga makilala kag mahangpan ang ginpili naton nga kabuhi, bilang mga aktibista, bilang lubos nga nagaserbisyo sa pumuluyo.

Tay, indi ka magkabalaka sa amon sang aton mga anak!

# Rebolusyonaryo nga pagsaludo kay Ka Jude Rimando! Pinakamataas nga pagpasidungog sa iya kabuhi bilang nagapamuno nga kadre sang rebolusyonaryong kahublagan masa sa kasyudaran sa Cebu!

*Mensahe halin sa Cebu Party Committee, Communist Party of the Philippines*

ANG REBOLUSYONARYO NGA MGA PWERSA sa Cebu nagahatag sang pinakamataas nga pagpasidungog kag pinakamainit nga pagsaludo kay Ka Jude Rimando, isa sa nagapamuno nga kadre sa Central Visayas nga naghalad sang iya kabuhi sa pagserbiyo sa pumuluyo kag sa rebolusyon.

Si Ka Jude, nga kilala sang mga kaupod sa Cebu nga si Ka Bing, nagsabat sa panawagan sa pagpadeploy halin sa Luzon pakadto sa Central Visayas sa iya *mid-30's*, nga naarmasan sang rebolusyonaryo nga kakahas kag kapagsik kon diin siya nakilal-an. Dako nga bahin sang iya nga rebolusyonaryo nga kabuhi iya gingahin sa sini nga rehiyon bilang nagapamuno nga kadre sang rebolusyonaryo nga kahublagan masa sa kasyudaran sang Cebu. Nagpamuno siya nga may entusiasmo samtang ginapunting ang mga bahin nga dapat pauswagon kag gindun-an ang mga

yabe nga angot bilang mga desaysibo nga aspeto para sa pagsulong. Ang kontribusyon ni Ka Bing sa rebolusyonaryo nga praktika sa rehiyon magapabilin tubtob sa katubtuban sa amon mga tagipusoon kag pamensaron bilang inspirasyon kag leksyon.

Mga 20 ka tuig ang nagligad kag bag-o pa lang sa rehiyon, madasig niya nga natun-an ang lenggwahe sang Bisaya kag sang ulihi nahanas na siya sa paghambal sini nga indi mo mahibaluan nga indi niya ini orihinal nga lenggwahe. Maukod siya makig-estorya sa masa nahanungod sa ila kabuhi, ila mga kabudlayan kag paano sila nakatibawas. Nakahibalo siya sang lenggwahe sang mga masa kag ginlubog ang iya kaugalingon upod sa ila paagi sa sa pagpuyo sa mga komunidad

*"Rebolusyonaryo..." sundan sa pahina 11*





*"Rebolusyonaryo..." halin sa pahina 10*

sang mga imol.

Tungod sa iya likom nga moda sang paghulag, mas is-trikto siya sang sa iban sa pag-oberbar sang mga tikang pang-seguridad kag gin-implu-wensiya ang iban nga mga ka-upod sang sining disiplina.

Bilang nagapamuno nga kadre sa kahublagan pesante, instru-mento siya sa pagrekober sang mga erya nga may importante nga papel sa hilikuton sang Cebu nga pagsuporta sa mga kaingod nga isla. Instrumento man si Ka Bing sa nagkalain-lain nga mga kampanya nga naghatag sang dalan sa mga bag-o nga opor-tunidad sa pag-organisa, pag-palapad sang mga bag-o nga mga erya kag pagpa-uswag sang mga kadre kag lider-masa.

Bilang nagapamuno nga kadre sang rebolusyonaryo nga kahublagan sang mga mamu-mugon, yabe siya nga personahe sa madinalag-on nga pungsod-non nga koordinado nga mga welga nga ang kadalag-an pu-litikal sini mas nga makita sa numero sang mga mamumugon nga nagdesisyon nga mag-or-ganisa sang lubos panahon pagkatapos sang welga. Isa ka madinalag-on nga ekperyensiya pagkatapos sang ikaduha nga kahublagan panadlong, siya kag ang iya kaupod nga mga organ-isador nagporma sang sanga sang Partido sa isa ka estrate-hiko nga industriya sa Cebu. Positibo ini nga leksyon sang mainantuson nga hilikuton masa nga sang ulihi nagpadulong sa pagtransporma sang unyon nga naglab-ot sa mayoriya nga ma-mumugon nga nagpasugot nga magwelga. Si Ka Bing kag iya kaupod nga mga organisador nagpanggas sang mga binhi sa pagpataas sang makasahi nga ka-muklatan sang mga mamumu-gon kon diin mahimo nga ga-

miton nga panugod sang mga magasinod nga mga organisador.

Para sa madamo nga mga kaupod sa Cebu, ginahanduraw si Ka Bing bilang kaupod nga daw tore ka taas tungod mataas siya kag dako apang indi sa punto nga matahap ka ukon mabudlay palapitan. May iya siya mga pamaagi nga mangin komportable ang mga kaupod sa iya presensya, iduso sila nga buhian ang ila inisyatiba kag kuhaon ang ila kumpyansa sa aktwal nga rebolusyonaryo nga praktika. Indi siya ang tipo nga tawo nga maghungit. Sa pag-kamatuod, kon kaisa mabudlayan man ang iban sa paghangup kon ano ang iya buot silingon. Apang may ara sa iya pamaagi sa masami niya nga pagporma sang mga pamangkot ukon mga tugda nga magatulod sa mga kaupod nga magpadalum kag mag-anali-sa ukon liwat analisisahon ang ila praktika. Iya ginapatigayon ang mga pagtulun-an paagi sa ma-sami nga pagpaathag sang mga prinsipyo sa likod sang iya mga obserbasyon kag mga panugyan. Yadtong mga nakatrabaho upod niya, tubtob subong masami nga magtumod sang mga ginpang-estoryahan ukon ginpaathag nga ginpaambit ni Ka Bing tinuig na ang nakaligad, iya ginapa-tigayon ang pagtuon sang ma-athag kag madalum nga paghangup sang rebolusyonaryo nga mga prinsipyo kag mga praktika. Manunudlo siya sang madamo kag naghanas sang mga sumulunod sang rebolusyon nga sa subong nagapamuno na-man nga mga kadre.

Sa may kasubo, nagatangis kami sa kamatayon ni Ka Bing. Amon ginapahayag ang amon kasubo sa iya asawa, iya mga kabataan kag mga utod. Amon ginatumod ang pasista nga es-tado nga responsable sa iya kamatayon kag nagasumpa nga amon pasabton ang tanan nga

may utang nga dugo batuk sa pumuluyo kag rebolusyon.

Sa aton tanan, aton han-durawon ang kamatayon pareho sa ginlaragway ni kaupod Jose Ma. Sison "Paano ang mangin baganihan"

*"Indi lamang ini kon paano napatay*

*nga nagahimo sa isa nga mangin baganihan.*

*Kundi ang kahulugan nga makuha*

*gikan sa paghimakas batuk sa kaaway.*

*May yara mga baganihan nga napatay sa patag-awayan.*

*May yara baganihan nga napatay sa gutom kag balatian,*

*May yara baganihan nga napatay sa aksidente,*

*May yara baganihan nga napatay sa katigulangan.*

*Kon ano man ang pamaagi sang kamatayon,*

*May komon nga basehan*

*Ang baganihan naga-alagad sa pumuluyo*

*tubtob sa katapusan sang iya ginhawa."*

Salamat, Ka Bing, sa kabuhi nga imo ginhalad sa masang ginapigos. Salamat sa imo dako nga amot sa rebolusyonaryong praktika sa Cebu. Baganihan ka, indi ka malipatan.

Sa may rebolusyonaryo nga kapagsik, aton i-transporma ang kamatayon ni Ka Bing kag yadtong iban nga mga baganihan nga may lubos nga determi-nasyon nga ipasulong ang re-bolusyonaryo nga buluhaton sa Cebu kag mag-amot sa mas dalagkuan pa nga mga kadalag-an para sa bug-os nga re-bolusyonaryo nga kahublagan.

**Mabuhi ang mga baganihan sang rebolusyon!**

**Magsulong para sa dalagkuan nga mga kadalag-an!** *RP*

# Mga parangal para kay Ka Ernesto Jude Rimando, ginhiwat!

NAGPATIGAYON SANG SILENT 21-GUN SALUTE kag simple nga mga programa ang mga Pulang hangaway sa mga larangan gerilya sa idalom sang Apolinario Gatmaitan Command-New People's Army Negros Island (AGC-NPA) para kay Ernesto Jude Rimando (Ka Dante) sang Agosto.

Ginpasidunggan sang NPA Negros si Ka Dante sa iya mga kontribusyon sa rebolusyonaryo nga kahublagan ilabi na sa isla.

Samtang, isa man ka parangal ang ginhiwat sang kapin sa 100 ka bilanggong pulitikal sa isla sang Negros bilang pagpasidungog sa kay Ka Dante sadtong bulan sang Hulyo.

Nagtaliwan si Ka Dante bangud sa iya masakit nga stage 4 kanser sa atay pila ka oras lang matapos ang *fasting* nga gintigayon sang grupo sadtong Hulyo 22, sa ikatatlo nga State of the Nation Address ni Marcos Jr.

Madumduman nga naghiwat sang *fasting* ang mga bilanggong pulitikal sa sina nga petsa agud ipanawagan sa rehimen US-Marcos Jr ang hinanali nga paghilway sa mga may edad kag sa mga naga-masakit nga mga bilanggong pulitikal sa makitawhanon nga basehan. Isa si Ka Dante sa ila gintumod nga nagakinahanglan sang hinanali nga paghilway.

Sa pahayag sang grupo, ila gindayaw si Ka Dante sa iya nga pagka-militante kag pagka-pursigido sa pagpatuman sang iya nagkalain-lain nga responsibilidad kag hilikuton bisan pa sa madamo nga mga pagtilaw kag mga sablag nga iya gin-atubang.

Naghiwat man sang mga parangal para kay Ka Dante ang mga nagkalain-lain nga mga progresibo nga organisasyon sa Metro Manila kag Cebu. **AP**

# Bug-os nga kabuhi para sa rebolusyon

ni Ka Shenji

*Batan-on pa isganan na,  
Kahublagan pamatan-on-estudyante ginpa-ibwal sa eskwelahan  
Pulang hayahay sang rebolusyon sa eskwelahan ginpawagayway  
Naglanog ang ila tingog pati sa kadalanan  
Ginkabig pinakabata nga kadre sa iya kapanahunan.*

*Ang pagkalamharon,  
Indi nangin upang sa pagsulong Nagtuon Marxistang teorya sang rebolusyon  
Gindapat sa ginsakbat nga dako nga hilikuton  
Mapamunuan ang malapad nga masang pamatan-on.*

*Ginpasangkad ang kaugalingon,  
Wala nagpalimita sa pamatan-on estudyante sa urban  
Ginsuong panghangkat sang masang mangunguma sa kaumhan  
Ginpaambit kinaalam kag kaisog bisan pa sa kabudlayan  
Tukuron pulang gahum sa kabukiran.*

*Huwaran sa pagka-indi maiya-iyahon,  
Sa bug-os nga kabuhi sa rebolusyon  
Ginpaambit ang kaugalingon sa iban nga rehiyon  
Kinaalam kag pagkapursigido nangin puhunan  
Sa pagbulig sa rebolusyon nga wala sang dulunan.*

*Wala paghubas rebolusyonaryong espirito,  
Gin-atubang grabe nga sakripisyo kag kabudlayan  
Sa pagsingki sang gerilyang pakig-away*

*Bisan kamatayon pa ang nagsaang  
Wala ginbuhian ang pandindugan pumuluyo dapat nga alagaran.*

*Wala pagkalingkang pangsulod nga banggaan,  
Duha ka kahublagan panadlong nagtindog sa husto  
Nagbulig pagtadlong sang sayup kag pagkaayo sang Partido Armadong paghimakas liwat mapasulong  
Tubtob handum sang kadalagan sang pumuluyo maagum.*

*Sa pagsulong sang rebolusyon nagluya ang panglawason,  
Napilitan mag-guwa para magpabulong  
Nahulog sa kamot sang kaaway  
Apang sa gihapon padayon nga naglig-on ang determinasyon  
Isulong ang rebolusyon bisan pa sa rehas nga malupigon.*

*Sobra apat ka dekada nga paghalad sang kaugalingon,  
Kaalang, kaisog, determinasyon kag pagkatampad sa rebolusyon  
Wala pagkataka sa paghimakas  
Kahilwayan sang pungsod dapat agumon  
Panalambiton sang kaupod tubtob sa iya kamatayon! **AP***

*Halad nga binalaybay para kay Kaupod Dante  
Setyembre 9, 2024*